

ጳውሎሲ ቴሴሎንቄ አሳስ ፃፊዳ ኮይሮ ኪታ ጋላ ቆፋ

ቴሴሎንቄይ፥ ሮሜ ቢታን ዴዲያ ማቀደኒያ አዉራጃስ ዋና ካታማ። ጳውሎሲ ፊልጲሲዮሳ ዮዲዲ ቢዳፕ ጉዮ ቴሴሎንቄን ዎሳ ኬላ ኤሲስ። ጊዶሺን፥ አይሁዴታ አማኑዋ ኤካናው ጊጌቲዲ ኡቲዳ አይሁዴ ጊዶና አሳይ፥ ጳውሎሲ ታማርሲያ፥ ኪሪስቲና አማኖ ቲሚርቲያን ምቲዳ ጊሾ አይሁዴቲ ቃናቲዲ፥ ጳውሎሳ ቲሚርቲያ ጳልቁዶሶና። ሄሳ ጊሾ፥ ጳውሎሲ ጋምዮሺን ቴሴሎንቄ ዮዲዲ፥ ቤሪያ ቢስ (1:9-10)። ጉዮፕ ኢ ቴሴሎንቄ ጋኪዳ ዎዴ ኢያ ማዲያ ጊሞቲዮሲ ቴሴሎንቄ ዎሳ ኬላን ዴዲያ ሃኖታ ኢያው ጊሺዲ አዲስ።

ጳውሎሲ ኮይሮ ኪታ ቴሴሎንቄ አሳስ ፃፊዳይ፥ አማኒያ አሳ ዞራናሳኔ ሚንሴሳናሳ። ኢ ኤንታ አማኑዋኔ ኤንታ ሲቁዋ ሎዎ ማርካቴሳ ሰዲዳ ዎዴ ዎሳ ጋላቴስ። ካሴ ኢ ኤንታ ጊዶን ዴዲዳ ዎዴ አይ ሜላ ዱሱ ዴዲዳኮ ኤንታ ሃሳይሴስ። ሄሳፌ ኪሪስቶሳ ናምዓንሶ ዩሳባ አይሼቲዳ አይሻስ ዛሮ ኢሜስ። ሄ አይሻታፕ ጉሳቲ፥ «ኪሪስቶሲ ናምዓንሶ ያናፕ ሲንሴ ሃይቂዳ አማኒያ አሲ ኪሪስቶሳ ዩሳይ ኢሚያ ሜሪና ዴዎ ኤካናው ዳንዳዲ? ኪሪስቶሲ ናምዓንሶ ያናይ አዉዴ?» ጌቴቴይሳታ። ጳውሎሲ ሄ ኢንጄ ዎዲያ ጎኔቲዲ፥ «ኪሪስቶሳ ናምዓንሶ ዩሳ ኡፋይሳን ናጊሼ ኢ ያና ጋካናው ዎፑ ጊዲ ሂንቴ አሶ አሲቴ» ያጊዲ ዞሬስ።

1 ቴሴሎንቄ ኪታ አይፌ ቆፋታ

ጌሎ ቆፋ 1:1

ጳውሎሳ ኡፋይሳኔ ጋላታ 1:2-3:13

አማኒያ አሳ ዴዎ ካሴሱዋ 4:1-12

ኪሪስቶሳ ናምዓንሶ ዩሳባ 4:13-5:11

ዉርሴሳ ዞሬ 5:12-22

ኩሻ ቆፋ 5:23-28

1 ጳውሎሲ ሲሳሴይኔ ጊሞቲዮሲ ቴሴሎንቄ ዎሳ ኬላን ዴዲያ፥ ዎሳ አዋባኔ ጎዳ ዮሱስ ኪሪስቶሳባ ጊዲዳ አሳስ ፃፊዳ ኪታ። አዶ ኬሃቴሳይኔ ሳሮይ ሂንቴው ጊዶ።

ቴሴሎንቄ አሳ ዴዎዋኔ አማኑዋ

2 ኑኒ ያሳ ዎሲያ ዎዴ ኡባን ሂንቴና ቆፒሼ ሂንቴ ጊሾ ኡባ ዎዴ ያሳ ጋላቶስ። 3 ያሳ ኑ አዎ ሲንሳን አማኖን ሂንቴ አሲዳ አሱዋ፣ ሲቆን ሂንቴ ዳቡሪዳ ዳቡራኔ ዩሱስ ኪሪስቶሳን ዴዲያ ኡፋይሳ ኤካናው ሂንቴ ሚኒዲ ኤቂዳ ኤቁዋ ኡባ ዎዴ ቆፖስ።

4 ኑ ኢሻቶ፣ ያሳይ ሂንቴና ዶሴይሳኔ ባ አሴ አሲዲ ሂንቴና ዶሪዳይሳ ኤሮስ። 5 አይስ ጊኮ፣ ኑኒ ዎንጌላ ዶና ዓላላን ጊዶናሺን ዎልቃን፣ ጌሻ አያናኒኔ ዎንጌላ ቱማ አማኖን ሂንቴው ኤሂዳ። ኑኒ ሂንቴራ ጋምዲዳ ዎዴ ኡባን ሂንቴ ጊሾ ዋኒዲ ዴዲዳኮ ሂንቴ ኤሬታ። 6 ሂንቴ ዳሮ ሜቶ ኤኪኮካ ጌሻ አያናይ ኢሚያ ኡፋይሳን ኪታ ኤኪዴታ፤ ኑናኔ ጎዳ ዳኒዴታ። 7 ሄሳ ጊሾ፣ ማቁዶኒያኔ አካያ ቢታን ዴዲያ አማኒያ ኡባስ ሴሚሶ ጊዲዴታ። 8 ጎዳ ቃላይ ሂንቴፌ ኪዩዲ፣ ማቁዶኒያኒኔ አካያ ዓላላን ጊዶናሺን ያሳ ሂንቴ አማኔይሲ ኡባሶን ሲዔቲስ። ሂዛ፣ ኑኒ ጋናባይ አይኮይካ ባዋ። 9 ኑኒ ሂንቴኮ ቢዳ ዎዴ ሂንቴ ኑና ሞኪዳ ሞኩዋኔ ሂንቴ፣ ሂንቴ ኤቃ አጊዲ ቱማኔ ዴዎ ያሳ ሃጋዛናው ሂንቴ ሲሚዳይሳ ኤንቲ ባንታ ሁዔን አዶሶና። 10 ቃሲ ያሳ ናዓይ፣ ዩሱሲ፣ ያሳይ ሃይቆፕ ዴንሳዳይሲ፣ ሲንሳፌ ያና ያሳ ሃንቁዋፌ ኑና አሻናይሲ፣ ሳሎፕ ያናይሳ ሂንቴ ናጌይሳ ኤንቲ ማርካቶሶና።

2

ጳውሎሲ ቴሴሎንቱን አሲዳ አሱዋ

1 ታ ኢሻቶ፣ ኑኒ ሂንቴኮ ቢዳይ ሜላ ጊዶናይሳ ሂንቴ፣ ሂንቴ ሁዔን ኤሬታ። 2 ሺን ኑኒ ሂንቴኮ ቴሴሎንቱ ያናፕ ሲንሴ ፊልጲሲዩሳ ካታማን ዋዩቲዳይሳኔ ጫዩቲዳይሳ ሂንቴ ኤሬታ። ዳሮ ኢያይ ዴዲኮካ ሂንቴው ኢያ ዎንጌላ አዳና ሜላ ያሳይ ኑስ ሚኖቴሴ ኢሚስ። 3 ኑኒ ሂንቴና ዞሪዳይ ባሌሶን ዎይኮ ጪሞን ዎይኮ ጌኔን ጊዴና።

4 ሺን ያሳይ ኑናን አማኔቲዲ ባ ዎንጌላ አዳና ሜላ ኑስ ሃዳራ ኢሚዳ ጊሾ አዶስ። ኑ ሄሳ አሴይ ኑ ዎዛና ቤዲያ ያሳ ኡፋይሳናሳፌ አቲን አሴ ኡፋይሳናሳ ጊዴና። 5 ኑ ሚሼ ያሪዲ ዎርዶ ሂንቴና ሳቢሼ ሂንቴኮ ዮናይሳ ሎይሲዲ ኤሬታ፤ ያሳይ ኑስ ማርካ። 6 ኑኒ ሂንቴፌ ጊዲን ዎይኮ ሃራ አሳ አዴፌካ ቦንቾ ኮዩቡኮ። 7 ኑኒ ኪሪስቶሳ ሃዋሬ ጊዴይሳዳ ኑስ ከሺያባ ኢሚቲ ጊዲ ኤካናው ዳንዳዎስ፣ ሺን አያ ባ ናይታ ዲቼይሳ ሜላ ሂንቴ ጊዶን አሽኬ ጊዲዳ። 8 ኑ ሂንቴና ዶሲዳ ጊሾ ያሳ ዎንጌላ ሂንቴው ሻኮ ዓላላ ጊዶናሺን ኑ ዴዑዋካ ሂንቴው ኢማናው ጊጊዳ። ሂንቴ ኑስ

1:6 ሃ.አ 17:5-9 2:2 ሃ.አ 16:19-24፣ 17:1-9

ዳር አልዎ።⁹ ኑ ኢሻቶ፣ ኑ አሱዋኔ ኑ ዳቡራ ኤሬታ። ሂንቴው ያሳ ዎንጌላ አዲሼ፣ ሂንቴና ዋይሶና ሜላ ቃማኔ ጋላስ አሲዳ።

¹⁰ ኑ ዴዎይ ሂንቴ አማኔይሳታ ማታኒኔ ያሳ ሲንሳን ጌሺ፣ ዒሎኔ ቦሬቶናይሳ ጊዴይሳስ ሂንቴ ማርካ። ¹¹ ኑኒ ሂንቴው ሁዔን ሁዔን ዩሊዳይሳቲ ባንታ ናይታስ ሃኔይሳዳ ሃኒዳይሳ ኤሬታ። ¹² ኑ ሂንቴና ዞሪዳ፣ ሚንሴሲዳ። ቃሲ ባ ካዎቴሳኔ ባ ቦንቹዋ ሻካናው ሂንቴና ዌጊያ ያሳ ኡፋይሲያ ዴዎ ሂንቴ ዳና ሜላ ሂንቴው ሚንሴዲ አዲዳ።

¹³ ሂንቴው ኑኒ ያሳ ቃላ አዲዳ ዎዴ አሳ ቃላዳ ጊዶናሺን ያሳ ቃላዳ ሲዲዲ ኤኪዳ ጊሾ ኑኒ ኡባ ዎዴ ያሳ ጋላቶስ። ኢ ቴማ ያሳ ቃላ፤ ያሳ ቃላይ አማኒያ ሂንቴናን አሴስ።

¹⁴ ታ ኢሻቶ፣ ሂንቴ ዩሁዳ ቢታን ዴዒያ ዎሳ ኪሳታኔ ያን ኪሪስቶስ ዩሱሳ ካሊያ አሳታዳ ሃኒዴታ። ኤንታ አይሁዴቲ ዋይሲዳይሳዳ ሂንቴናካ ሂንቴ ቢታ አሳይ ዋይሲዶሶና። ¹⁵ ሄ አይሁዴቲ ጎዳ ዩሱሳኔ ናቤታ ዎዲዶሶና፤ ቃሲ ኑና ጎዲዶሶና። ኤንቲ ያሳ ኡፋይሶናይሳታኔ አሴ ኡባ ኢዌይሳታ። ¹⁶ ኤንቲ ሃሪ አቶሺን፣ አይሁዴ ጊዶና አሳይ አታና ሜላ ኑኒ ኤንታው ቃላ አዴይሳ ዲጎሶና። ሄሳዳ ሃኒዲ ኤንታ ናጋራ ፀዓይ ኩማና ጋካናው ኡባ ዎዴ ናጋራ አሶሶና። ዉርሴሳን፣ ያሳ ሃንቆይ ኤንታ ቦላ ዎዴስ።

ጳውሎሲ ቴሴሎንቄ አሳ ዛሪ ቤዓናው አሞቲስ

¹⁷ ሺን ኑ ኢሻቶ፣ ኑኒ ኑ ቆፋን ጊዶናሺን አሾን ሂንቴፌ ሻኬቲዲ ጉላ ዎዴ ጋምዒዳይሳን ሂንቴና ዳር ላሞቲዲ ቤዓናው ኮዩዳ። ¹⁸ ኑ ሲሚ ሂንቴኮ ባናው ኮዩዳ። ታኒ ታ ሁዔን ሂንቴኮ ባናው ኮያስ፣ ሺን ዓላሄይ ኑና ዲጊስ። ¹⁹ ሂዛ፣ ኑ ጎዳ ዩሱስ ኪሪስቶሲ ያ ዎዴ ኑ ኡፋይሳይ ዎይኮ ኑ ጩቁቲያ ኑ ካላቻይ አኔ? ሂንቴና ጊዴኬቲዩ? ²⁰ ቴማ ሂንቴ ኑ ቦንቾኔ ኑ ኡፋይሲ።

3

¹ ሄሳ ጊሾ፣ ኑስ ጌንጫናው ዳንዳዔቶና ኢዌን፣ አቴና ካታማን ኑርካ አታናው ቆፋ ቃቺዳ። ² ሂንቴና ዞራናዳኔ አማኖን ሂንቴና ሚንሴሳናዳ ኑራ ኢሲፌ ያሳስ አሴይሳኔ ኪሪስቶሳ ዎንጌላ አዲያ ኑ ኢሻ ሳሞቲዮሳ ሂንቴኮ ኪቲዳ። ³ ሂንቴና ጋኪዳ ጎዳን ሂንቴፌ አኒካ ጉዬ ሲሞፎ። ሄ ጎዳይ ኑስ ያሳ ሼኔ ጊዴይሳ ሂንቴ፣ ሂንቴ ሁዔን ኤሬታ። ⁴ ኑ ሂንቴራ ዴዒያ ዎዴ ጎዲ ጋካናይሳ ሂንቴው

2:14 ሃ.አ 17:5 2:15 ሃ.አ 9:23፣ 29፣ 13:45፣ 50፣ 14:2፣ 5፣ 19፣ 17:5፣ 13፣ 18:12 3:1 ሃ.አ 17:15

ኮይሮቲዲ አዲዳ። ሂንቴ ኤሬይሳ ሜላ ሄሳዳ ሃረስ። ⁵ ሄሳ ጊሾ፥ ታው ገንጫናው ዳንዳዔቶና ኢጊን፥ «አኒ ኤሪ 9ላሄይ ኤንታ ፓጩዲ ኑ ዳቡራ ሜላ አሾና አጌና» ጋዳ ሂንቴ አማኑዋባ ኤራናው ጊሞቲዮሳ ሂንቴኮ ኪታስ።

⁶ ሃዒ ጊሞቲዮሲ ሂንቴ ማታፔ ዩዲ፥ ሂንቴ አማኑዋባኔ ሂንቴ ሲቁዋባ ሎዖ ዎሬ አዲስ። ቃሲ ሂንቴ ኡባ ዎዴ ኑስ ሎዖ ቆፔይሳኔ ኑኒ ሂንቴና ቤዓናው ላሞቴይሳዳ ሂንቴካ ኑና ቤዓናው ላሞቴይሳ ኢ ኑስ አዲስ። ⁷ ታ ኢሻቶ፥ ኑና ጋኪያ ዋያኒኔ ኑ ሜቶ ኡባን ሂንቴ አማኑዋ ጊሾ ሂንቴናን ሚኔቲዳ። ⁸ ሂንቴ ጎዳን ሚኒዲ ዴዒኮ ኑካ ዴዖን ዴዖስ። ⁹ ሂዛ፥ ኑኒ ሂንቴ ጋሶን ዴሚዳ ኡፋይሳስ ዖሳ ዋቲ ጋላቲኖ? ¹⁰ ኑኒ ሂንቴና ቤዓናውኔ ሂንቴ አማኑዋን ፓጩዳባ ኩንላናው ቃማኔ ጋላስ ኑ ኩሜላ ዎዛናን ዖሳ ዎሶስ።

¹¹ ዖሳይ ኑ አዋይ ባ ሁዔኒኔ ኑ ጎዳይ ዩሱስ ኪሪስቶሲ ኑ ሂንቴኮ ባና አጊያ ጊጊሶ። ¹² ኑ ሂንቴና ዳሮ ዶሴይሳዳ ጎዳይ ሂንቴ ኢሶይ ኢሱዋ ሲቂያ ሲቆኔ አሴ ኡባ ሲቂያ ሲቆ ሂንቴው ዳርሶኔ ጉጆ። ¹³ ኑ ጎዳይ ዩሱስ ኪሪስቶሲ ባ ጌሻታራ ያ ዎዴ ዖሳ፥ ኑ አዋ ሲንላን ሂንቴ ዎዛናይ ጌሺኔ ቦሬይ ባይናይሳ አሲዲ ኢ ሂንቴና ሚንሴላና።

4

ዖሳ ኡፋይሴያ ዴዖ

¹ ዉርሴላን፥ ታ ኢሻቶ፥ ዖሳ ኡፋይሳናው ሂንቴ ዋኒዲ ዳናው ቤሲያኮ ኑፔ ታማሪዴታ። ሄሲ ሂንቴ ኮይሮፔ ዴዒዳ ዴዑዋ፥ ሺን ሃዒ ሂንቴ ካሴይሳሬ አሲዲ አላናዳ ጎዳ ዩሱሳ ሱንላን ሂንቴና ዎሶሲኔ ዘሮስ። ² ኑኒ ጎዳ ዩሱሳ ማታን ሂንቴና ኪቲዳ ኪታይ አዉሴኮ ኤሬታ።

³ ዖሳይ፥ ሂንቴ ጌሺ ጊዳና ሜላኔ ላይማቶና ሜላ ኮዩስ። ⁴ ሂንቴ ኢሶይ ኢሶይ፥ ሂንቴ ማቼታራ ጌሻቴላኒኔ ቦንቾን ዳናው ቤሴስ። ⁵ ዖሳ ኤሮናኔ አማኖና አሳዳ ላይማቴላ አዎን ፁጌቶፊቴ። ⁶ ኑ ካሴ ሂንቴው አዲዳይሳዳኔ ሚንሲ ዘሪዳይሳዳ ጎዳይ ሄሳ ሜላባ አሲያ ኡባ ፐርዲያ ጊሾ አኒካ ሃይሳታን ባ አማኒያ ኢሻ ናቃናውኔ ጨማናው ቤሲና። ⁷ ዖሳይ ኑኒ ጌሻቴላን ዳና ሜላፔ አቲን ቴናቴላን ዳና ሜላ ያጊቤና። ⁸ ሄሳ ጊሾ፥ ሃ ቲሚርቲያ ኢጊያ አኒካ ሂንቴው ጌሻ አያና ኢሚያ ዖሳ ኢዲስፔ አቲን አሴ ጊዴና።

3:6 ሃ.አ 18:5

9 ሂንቴ ኢሶይ ኢሱዋ ዋቲ ሲቃኒኮ ያሳይ ሂንቴና ታማርሲዳ ጊሾ ሃሲ ሲቆባ ኑ ህንቴው ዓፋናው ኮሼና። 10 ቃሲ ማቄዶኒያ ቢታን ዴዲያ አማኒያ ኢሻታ ኡባ ተማ ሂንቴ ዶሴታ። ሺን ኑ ኢሻቶ፣ ሃሲካ ሂንቴ ኤንታ አሲ ዶሳና ሜላ ሂንቴና ዎሶስ።

11 ኑኒ ካሴ ሂንቴው አዲዳይሳዳ ዎፑ ጊዳ ዴዑዋ ዴዲቴ። ሂንቴ፣ ሂንቴ አሶ አሲዲ ሂንቴው ዱሳስ ኮሺያባ ዴሚቴ።

12 ሄሳዳ ሃኒኮ፣ አማኖናይሳታ ማታን ሂንቴ ቦንቴታና፤ ቃሲ ሂንቴና ኮሺያባስ አናካ አዳሼኬታ።

ጎዳ ዩሳባ

13 ኑ ኢሻቶ፣ አማኒዲ ሃይቂዳ አሳቲ ሃናናባ ሂንቴ ኤራና ሜላ ኮኖስ። ሂንቴ ኤንታ ጊሾ ኡፋይሲ ባይና አሳዳ ካዮቶሬቴ።

14 ኑኒ፣ ዩሱሲ ሃይቂዳይሳኔ ቃሲ ሃይቆፕ ዴንዲዳይሳ አማኖስ። ሄሳዳካ፣ ያሳይ ዩሱሳ አማኒዲ ሃይቂዳይሳታ ኢያራ ዎላ ኤሃናይሳ አማኖስ።

15 ጎዳይ ኑስ አዲዳይሳዳ ጎዳይ ያ ጋላስ ኢያራ ጋሄታናው ኑኒ ጋግ ዴዲይሳቲ፣ ሃይቂዳይሳታፕ ሲንሳቶኮ። 16 ጎዳይ ዎልቃማ ኪታራ፣ ኪታንቾታ ሃላቃ ጊርሳራ፣ ያሳ ዎይዜ ፑኖራ፣ ሳሎፕ ዎዳና። ኪሪስቶሳ አማኒዲ ሃይቂዳይሳቲ ኮይርቲዲ ሃይቆፕ ዴንዳና። 17 ሄሳፌ ጉዩ፣ ሄ ዎዴ ኑኒ ጋግ ዴዲይሳቲ፣ ጎዳራ ሻራን ጋሄታናው ኤንታራ ኢሲፌ ሳሎ ኤኬታና። ሄሳፌ ጉዩ፣ ኑኒ ጎዳራ ኢሲፌ ሜሪናው ዳና። 18 ሄሳ ጊሾ፣ ሃ ቃላን ኢሶይ ኢሱዋ ሚንሴሴቴ።

5

ጎዳ ዩሳ ጊጊዲ ናጊቴ

1 ታ ኢሻቶ፣ ሃ ሃኖቲ ሃናና ዎዲያኔ አጌና ሂንቴው ዓፋናው ኮሼና። 2 ጎዳ ጋላሳይ ካይሶይ ቃማ ዩይሳዳ ያናይሳ ሂንቴ ሎይሴ ኤሬታ። 3 አሳይ፣ «ሳሲ ሳር፣ አይኮይካ ሃኔና» ያጊሺን፣ ማጫስ ኢቁሲ አይኬይሳዳ ዳዮይ ኤንቲ ቆፖና ኤንታ ቦላ ያና። ኤንቲ አይ አጌንካ ኪሲ ኤኮኮና።

4 ሺን ኑ ኢሻቶ፣ ሄ ጋላሳይ ሂንቴው ካይሶይ ዩይሳዳ ያናው ሂንቴ ዱማን ዴዲኬታ። 5 ሂንቴ ኡባይ ፖፖ አሲኔ ጋላሳን ዴዲያ አሲ፤ ኑኒ ቃማ አሲ ዎይኮ ዱማ አሲ ጊዶኮ። 6 ሄሳ ጊሾ፣ ኑኒ ሃራቲ ዲስኬይሳዳ ዲስካናው ቤሴና፤ ኑኒ ባርካንዉኔ ጊጊዲ ዳናው ቤሴስ። 7 ዲስኬይሳቲ ቃማ ዲስኮሶና፤ ማሶቴይሳቲ ቃማ ማሶቶሶና። 8 ሺን ኑኒ ጋላሳ አሲ ጊዲያ ጊሾ ጊጊዲ ዳናው

ቤሴስ። አማኖኔ ሲቆ ፀፋሬዳ ቲራን ማዲዲ፣ አቶቴሳ ኡፋይሳ ሁዔን ዎሲያ አላ ቢራታ ባርኔፃዳ ዎሲዲ ዳናው ቤሴስ።⁹ ያሳይ ኑና ኑ ጎዳ ዩሱስ ኪሪስቶሳ ባጋራ ኩሜሳ አቶቴሲ ኤካና ሜላ ዶሪስፔ አቲን ሃንቆስ ዶሪቤና።¹⁰ ኑኒ ፓፃ ዴዲን ዎይኮ ሃይቂን፣ ኪሪስቶሲ ያ ዎዴ ኢያራ ኢሲፌ ዳና ሜላ ኪሪስቶሲ ኑ ጊሾ ሃይቂስ።¹¹ ሄሳ ጊሾ፣ ሂንቴ ካሴ አሴይሳዳ፣ ኢሶይ ኢሱዋ ሚንሴሲቴኔ ዲቺቴ።

ወርሴሳ ዞሬኔ ሳሮታ

¹² ኑ ኢሻቶ፣ ሂንቴ ጊዶን አሴይሳታ፣ ሂንቴና ካሴሳና ሜላኔ ዞራና ሜላ ጎዳይ ዶሪዳይሳታ ቦንቻና ሜላ ሂንቴና ዎሶስ።¹³ ኤንቲ አሲያ አሱዋ ጊሾ ኤንታ ዳሮ ቦንቺቴኔ ሲቂቴ። ኢሶይ ኢሱዋራ ሳሮቴሳን ዴዲቴ።

¹⁴ ኑ ኢሻቶ፣ ኑኒ ሂንቴና ዞሮስ። ቦዛታ ሃንቂቴ፤ ባቤይሳታ ሚንሴሲቴ፤ ዳቡራንቾታ ማዲቴ፤ አሴ ኡባ ዳንዳዲቴ።¹⁵ አኒካ ኢታ ጊሾ ኢታ ዛሮና ሜላ ናጌቴቴ። ሂንቴ ዎሊሲኔ አሳ ኡባስ ሎዎባ አሳናው ሚኒቴ።

¹⁶ ኡባ ዎዴ ኡፋይቲቴ።¹⁷ ኡባ ዎዴ ያሳ ዎሲቴ።¹⁸ ኡባባን ጋላቲቴ። ኪሪስቶስ ዩሱሳ ባጋራ ያሳይ ሂንቴፌ ኮዩይ ሄሳ።

¹⁹ ጌሻ አያና አሱዋ ቶይሶፒቴ።²⁰ ቲንቢቴ ቃላ ካዶፒቴ።

²¹ ኡባባ ፓጩቴ፤ ሎዎባ ኤኪቴ።²² ኢታ አሶ ኡባፌ ሃኪቴ።

²³ ሳሮ ኢሚያ ያሳይ ባ ሁዔን ሂንቴና ፖሎ ጌሾ። ኑ ጎዳይ ዩሱስ ኪሪስቶሲ ያና ጋላሳስ፣ ያሳይ ሂንቴ አያና፣ ሂንቴ ሼምፑዋኔ ሂንቴ ኩሜሳ አሳቴሳ ቦሬይ ባይና ናጎ።²⁴ ሂንቴና ጌይይሲ አማኔቲዳይሳ ጊዲያ ጊሾ ሄሳ ኢ ፖላና።

²⁵ ኑ ኢሻቶ፣ ኑስ ያሳ ዎሲቴ።

²⁶ አማኒያ አሳ ኡባ ጌሻ ዩሬቴሳን ሳሮሲቴ።

²⁷ ሂንቴ ሃ ኪታ አማኒያ አሳ ኡባስ ናባባናዳ ጎዳ ሱንሳን ሂንቴና ዎሳይስ።

²⁸ ኑ ጎዳ ዩሱስ ኪሪስቶሳ አዶ ኬሃቴሳይ ሂንቴራ ኢሲፌ ጊዶ። አሚንዲ።

አራሳ ጫቁዋ ጎፋሉ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 12 Mar 2019 from source files dated 12
Mar 2019
c35d6c73-3843-5482-b53e-7559d35deee5